

每週經課朗誦經文(巴克禮漢羅/教羅)2014/01/19

共同經課 - 1

以賽亞書四十九章一節~七節

1 Chiah-ê 海嶼 ah, tiòh 聽我 ê 話; chiah-ê 百姓 ah, tiòh 留心 tùi 遠遠來聽。Tùi 我 tī 胎裡, 耶和華就揀召我; tùi 我 tī 老母 ê 腹肚就叫我 ê 名。2 祂 hō 我 ê 嘴親像利刀, 將我 khng tī 祂 ê 手 ê 致蔭下; koh hō 我成做磨光 ê 箭, 將我 khng tī 祂 ê 箭袋。3 對我講, 你是我 ê 奴僕以色列, 我 beh 因為你得 tiòh 榮光。4 我就講, 我 tiòh 磨是空空, 我盡力是無利益也無 chhái-kang; 若是我 ê 判斷在 tī 耶和華, 我 ê 報賞在 tī 我 ê 上帝。5 耶和華 tùi 胎裡造就我做祂 ê 奴僕, beh hō 雅各歸向祂, hō 以色列聚集 tī 祂 hia; (因為耶和華看我做尊貴, 我 ê 上帝也成做我 ê 氣力); 6 祂有講, 你做我 ê 奴僕振興雅各 ê 支派, hō 以色列中得 tiòh 保全 ê 倒 tng 來, 這 iáu 是小 khoá 事; 我 beh 設立你做列邦 ê 光, 做我 ê 拯救 ê, 到 tī 地極。7 救贖以色列 ê 聖主耶和華, 對 hit-ê hō 人所看輕, 百姓所厭惡, 官長所壓制 ê, án-ni 講, 君王 beh 看見你, 就起來 khiā, 首領也 beh 跪拜; 這 lóng 是為 tiòh 耶和華是真實 ê, 就是以色列 ê 聖 ê 有揀你。

共同經課 - 2

詩篇四十篇一節~十一節

1 大衛 ê 詩, 交 hō 樂官。1) 我 bat 吞忍 thèng 候耶和華; 伊 àⁿ 落 òng 我, 聽我 ê 求叫。2 伊 tùi thang 驚 ê 陷坑, tùi 土糜中, 牽我起來; Hō 我 ê 腳 khiā tī 石磐頂, hō 我 ê 腳步在伍。3 伊 hō 我 ê 嘴唱新 ê 歌, 就是 o-ló 阮 ê 上帝 ê; Choē-choē 人 beh 看見來驚畏, 亦 beh ó 靠耶和華。4 獨獨 ó 靠耶和華, 無 chhap hiah-ê 驕傲, 以及偏 òng 虛假 ê 人, Chit 號人有福氣。5 耶和華我 ê 上帝 ah, 你所行 ê 奇事, 以及你對阮所存 ê 念頭真 choē; Boē 能對你排列; 我若 beh 提起來講, Hit-ê 數額算 boē 了。6 祭祀 kap 禮物你無歡喜; 你有 khui 我 ê 耳孔; 燒祭 kap 贖罪祭, 你無 ài-tih; 7 Hit 時我講, 你看, 我來 lah; 我 ê 事已經記 tī 冊裡。8 我 ê 上帝 ah, 你 ê 旨意我歡喜 thàn; 你 ê 律法 tī 我 ê 心內。9 我 tī 大聚會 ê 中間, 宣傳公義 ê 好消息; 我無 beh 停止我 ê 嘴唇; 耶和華 ah, 這是你所知 ê。10 我 bē-bat 將你 ê 公義蓋密 tī 我 ê 心內; 我已經排列你 ê 信實, kap 你 ê 救恩。我對大聚會 bē-bat 隱 khng 你 ê 慈愛 kap 誠實。11 耶和華 ah, 求你 m-thang 對我停止你 ê 慈悲; 願你 ê 慈愛 kap 誠實常常保護我。

共同經課 - 3

哥林多前書一章一節~九節

1 Tùi 上帝 ê 旨意受召做耶穌基督 ê 使徒保羅, kap 兄弟 Só-thê-ni, 2 phoe 寄 hō 上帝 ê 教會 tī 哥林多 ê, 就是 tiàm-tī 基督耶穌成聖、受召做聖徒, 以及見若 tak 所在求叫咱 ê 主耶穌基督 ê 名 ê, 主是 in ê, 也是咱 ê; 3 願 lín 對咱 ê 父上帝 kap 主耶穌基督得 tiòh 恩典平安。4 我常常替 lín 感謝我 ê 上帝, 是為 tiòh 上帝 ê 恩典 tī 耶穌基督 bat 賞賜 lín ê, 5 因為 lín tiàm-tī 伊 tak 項 tǎi-chì 富足, 口才知識無 m-齊備, 6 親像基督 ê 干證得 tiòh 堅固 tī lín ê 中間; 7 致到 lín tī chiah-ê 恩賜無一項無夠額, 來 thèng 候咱 ê 主耶穌基督 ê 顯現; 8 伊也 beh 堅固 lín 到路尾, tī 咱 ê 主耶穌基督 ê 日無 thang 嫌。9 上帝是信實, lín tùi 伊受召來 kap 伊 ê Kiáⁿ 咱 ê 主耶穌基督結聯。

共同經課 - 4

約翰福音一章二十九節~四十二節

29 隔日, 約翰看見耶穌就近伊, 就講, 你看, 上帝 ê 羊羔, 就是擔當世間 ê 罪 ê。30 Chit-ê 就是我所 bat 講, 有一人 tè 尾我來, 成做我 ê 事先, 因為伊本事先我 tī-teh。31 我本 m-bat 伊; 獨獨 beh hō 伊顯明 tī 以色列人, 所以我來用水行洗禮。32 約翰 koh 干證講, 我 bat 看見聖神親像鴿 á tùi 天降落, 歇 tī 伊頂面。33 我平素 m-bat 伊; 獨獨差我用水行洗禮 ê, kā 我講, 你看聖神降臨, 歇 tī 伊頂面, 伊就是用聖神行洗禮 ê。34 我 bat 看見, 來干證 chit-ê 是上帝 ê kiáⁿ。35 Koh 隔日, 約翰 kap 伊兩個學生 teh khiā; 36 看見耶穌 teh 行, 就講, 你看, 上帝 ê 羊羔。37 Hit 兩個學生聽伊所講, 就 tè 耶穌。38 耶穌 oát-tng 身, 看 in teh tè 伊, 就 kā in 講, Lín teh chhē 甚麼? In kā 伊講, 拉比, 你 tiàm-tī tá-lòh? (拉比, 翻譯就是先生)39 耶穌 kā in 講, Lín 來就會看見。In 就去, 看伊所 toà ê 所在; hit 日 kap 伊 saⁿ-kap toà; hit 時約略四點鐘。40 聽約翰 ê 話來 tè 耶穌 ê 兩人, 其中一個是西門彼得 ê 兄弟, 安得烈。41 伊事先 tú-tiòh in 兄弟西門, kā 伊講, 阮已經 tú-tiòh 彌賽亞(翻譯就是基督)。42 就 chhoā 伊就近耶穌。耶穌看伊講, 你就是約翰 ê kiáⁿ 西門; 你 beh 稱做磯法(翻譯就是彼得)。